



Broj: IP-03-47-5-07384/12VT
Banja Luka, 13.8.2012. godine

Institut za intelektualno vlasništvo Bosne i Hercegovine (u daljem tekstu: Institut), na osnovu člana 11. a u vezi sa članom 44. Zakona o kolektivnom ostvarivanju autorskog i srodnih prava („Službeni glasnik BiH“ broj 63/10), čl. 114. i 193. stav (1) Zakona o upravnom postupku („Službeni glasnik BiH“ br. 29/02, 12/04, 88/07 i 93/09), postupajući po službenoj dužnosti, d o n o s i

R J E Š E N J E

o oduzimanju dozvole za ostvarivanje prava umjetnika izvođača

1. **ODUZIMA SE dozvola** Udruženju nezavisnih muzičkih autora, izvođača, aranžera i javnih ličnosti „Uzus“ Sarajevo, Ulica Mis Irbina broj 22, koju je izdao Institut za standarde, mjeriteljstvo i intelektualno vlasništvo Bosne i Hercegovine Rješenjem broj IP-5472/03-01 SŽ od 30.6.2003. godine, **za obavljanje djelatnosti ostvarivanja prava umjetnika izvođača na osnovu punomoći umjetnika izvođača, organizacija umjetnika izvođača ili drugog nosioca prava umjetnika izvođača.**
2. Dozvola za obavljanje djelatnosti ostvarivanja prava umjetnika izvođača oduzima se sa danom **11.8.2012. godine.**
3. Udruženje nezavisnih muzičkih autora, izvođača, aranžera i javnih ličnosti „Uzus“ Sarajevo dužno je da dostavi Institutu izvještaj o poslovanju, raspodjeli i utrošku sredstava zaključno sa danom važenja dozvole, u zakonskom roku.
4. Udruženje nezavisnih muzičkih autora, izvođača, aranžera i javnih ličnosti „Uzus“ Sarajevo dužno je da organizaciji koja dobije dozvolu za kolektivno ostvarivanje izvođačkih prava ustupi svu relevantnu dokumentaciju neophodnu za obavljanje ove djelatnosti u roku od 30 dana od dana izdavanja dozvole.
5. Ovo rješenje objaviti u „Službenom glasniku BiH“ i u „Službenom glasniku Instituta“.

Obrazloženje

Institut za standarde, mjeriteljstvo i intelektualno vlasništvo Bosne i Hercegovine, pravni prethodnik Instituta za intelektualno vlasništvo Bosne i Hercegovine, Rješenjem broj IP-5472/03-01 SŽ od 30.6.2003. godine izdao je Udruženju nezavisnih muzičkih autora, izvođača, aranžera i javnih ličnosti „Uzus“ Sarajevo odobrenje za obavljanje djelatnosti ostvarivanja prava umjetnika izvođača, organizacija umjetnika izvođača ili drugog nosioca prava umjetnika izvođača.

Zakonom o kolektivnom ostvarivanju autorskog i srodnih prava („Službeni glasnik BiH“ broj 63/10), koji je stupio na snagu 11.8.2010. godine, dozvoljen je nastavak rada postojećim kolektivnim organizacijama pod uvjetima utvrđenim članom 44. Naime, navedenim članom u stavu (1) Zakona propisano je da organizacije autorâ i drugih nosilaca autorskih prava, te druga pravna lica specijalizirana za ostvarivanje autorskih prava koja su, prema odredbi člana 87. Zakona o autorskom pravu i srodnim pravima u BiH („Službeni glasnik BiH“ br. 7/02 i 76/06), obavljala poslove kolektivnog ostvarivanja autorskog prava prije stupanja na snagu ovog zakona nastavljaju da rade i poslije stupanja na snagu ovog zakona. Stavom (2) istog člana predviđeno je da su svi subjekti iz prethodnog stava obavezni da usklade svoj statusni oblik i svoje poslovanje sa odredbama novog zakona i podnesu zahtjev za izdavanje nove dozvole za obavljanje poslova kolektivnog ostvarivanja autorskog i srodnih prava u roku od dvije godine od stupanja na snagu ovoga zakona.

Poslovanje Udruženja nezavisnih muzičkih autora, izvođača, aranžera i javnih ličnosti „Uzus“ Sarajevo bilo je predmet analize u okviru Izvještaja o funkcioniranju sistema kolektivnog ostvarivanja autorskog i srodnih prava u Bosni i Hercegovini za period od 2005. do 2010. godine, koji je usvojila Parlamentarna skupština Bosne i Hercegovine, na sjednici Predstavničkog doma održanoj 19.4.2012. godine i sjednici Doma naroda održanoj 15.5.2012. godine. U Izvještaju je zaključeno da Udruženje „Uzus“ Sarajevo krši osnovne principe kolektivnog ostvarivanja prava, jer iskazuje veliki nesrazmjer između troškova poslovanja i raspodijeljenih sredstava, da organi Udruženja nisu obavljali poslove iz svoje nadležnosti i da se dosadašnji način poslovanja „Uzusa“ ne može nastaviti, jer ne zadovoljava standarde u pogledu transparentnosti i demokratičnosti rada organizacije, načina raspodjele prihoda i efikasnosti ostvarivanja zakonski reguliranog cilja.

Udruženje za zaštitu prava izvođača „Uzus“ Sarajevo podnijelo je zahtjev za izdavanje dozvole za obavljanje poslova kolektivnog ostvarivanja prava izvođača, koji je zaprimljen u Institutu 31.7.2012. godine pod brojem UP-03-47-5-08074/12. Članom 208. Zakona o upravnom postupku predviđeno je da u slučajevima kada se postupak pokreće po zahtjevu stranke, a prije donošenja rješenja potrebno je provesti poseban ispitni postupak, nadležni organ je dužan da donese rješenje najkasnije u roku od 60 dana. Zakonom o kolektivnom ostvarivanju autorskog i srodnih prava („Službeni glasnik BiH“ broj 63/10) u čl. 10. stav (3) i 47. utvrđena je obaveza Instituta za intelektualno vlasništvo BiH da donese propise za provođenje postupka za davanje dozvole za kolektivno ostvarivanje autorskog i srodnih prava. Način i forma ispunjavanja uvjeta za davanje dozvole pravnim licima za obavljanje poslova kolektivnog ostvarivanja autorskog i srodnih prava uređeni su Pravilnikom o načinu i formi ispunjavanja uvjeta za davanje dozvole pravnim licima za obavljanje poslova kolektivnog ostvarivanja autorskog i srodnih prava („Službeni glasnik BiH“ broj 44/11). Članom 18. Pravilnika o načinu i formi ispunjavanja uvjeta za davanje dozvole pravnim licima za obavljanje poslova kolektivnog ostvarivanja autorskog i srodnih prava predviđeno je da će Institut na osnovu primljenog pisanog zahtjeva provesti postupak za izdavanje dozvole najkasnije u roku od šest mjeseci. Ako podaci i dokumentacija nisu potpuni, rok počinje da teče kada pravno lice, u skladu sa pozivom Instituta, uredi zahtjev. Dalje, ako Institut odluči da pribavi mišljenje Vijeća za autorsko pravo i srodna prava ili nezavisnih stručnjaka, odnosno stručnih institucija ili organizacija, tada rok za odlučivanje Instituta iznosi 30 dana od dana prijema stručnog mišljenja.

Imajući u vidu da se radi o složenom upravnom predmetu, da je zahtjev za izdavanje dozvole podnesen 31.7.2012. godine, da važeća dozvola ističe 11.8.2012. godine, a uzimajući u obzir navedene rokove za donošenje rješenja, evidentno je da je zahtjev podnesen u neprimjereno kratkom roku, te da nije mogao da bude procesuiran do datuma isteka dozvole.

Nesporno je da je Udruženje „Uzus“ dužno da izvrši isplate prikupljenih sredstava svim nosiocima čija prava je ostvarivalo za period do kojeg je imalo važeću dozvolu, te da je dužno da sve relevantne podatke i dokumentaciju koji su neophodni za obavljanje poslova ustupi novoj kolektivnoj organizaciji koja će ostvarivati ova prava.

Prema članu 13. stav (4) Zakona o kolektivnom ostvarivanju autorskog i srodnih prava, obavještenje o odluci o oduzimanju dozvole objavljuje se u „Službenom glasniku BiH“ i u „Službenom glasniku Instituta“, te je odlučeno kao u tački 5. ovog rješenja.

Pouka o pravnom lijeku: Ovo rješenje je konačno u upravnom postupku. Protiv ovog rješenja može da se pokrene upravni spor podnošenjem tužbe Sudu Bosne i Hercegovine u roku od 60 dana od dana prijema ovoga rješenja.

Direktorica
Instituta za intelektualno vlasništvo
Bosne i Hercegovine
Lidija Vignjević